

Ekwo-ozĩ K'ẹbo
Pyĩta
Deru

¹ Ekwo-ozĩ-a bẹ shi l'ẹka mbẹdua, bụ Sayĩmonu Pyĩta, onye ejeru Jizọsu Kéreshi ozi; bya abụkwarupho onye-ishi-ozĩ iya. Ndu mu ede iya anụ bụ unubẹ ndu ono shi l'apfubekoto kẹ Chileke mẹ kẹ Onye-Ndzọta bụ Jizọsu Kéreshi nata ekweta ọphu bụ ọkpobe iya gẹ k'anyịbedua.

² Gẹ Chileke mekwaa g'unu kabaa ya amaru; l'o mekwaapho g'unu kabaa amaru Nnajiuphu anyi bụ Jizọsu ọkpobe amaru eje. G'eze-iphe-oma mẹ ẹhu-guu, shi iya l'ẹka rwube unu ẹka rwube iya k'anyịnyi.

Chileke kuru unu bya ahọta unu

³ Anyi maru Nnajiuphu ono marweta iya ree; mbụ onye ono, bụ iya kuru anyi g'anyi bya g'anyi l'iya gbarụ mgba l'ọdu-biribiri iya; waa l'iphe-oma, ọonoduje eme. Ọo l'amama ono, anyi maru iya ono bẹ Chileke shi gude eze ike nkiya nụ anyi iphemiphe, mkpa iya dūru anyi g'anyi gude nọduru iya ndzụ; emekwapho umere, egoshije l'anyi akwabẹ iya ùbvù. ⁴ Ọo eze ike iya ono bẹ o gudekwapho kweshia anyi ukwe-iphe, dūkota ree ọkpobe adudu; ukwe-iphe dakiri atụ ọnu iya; ọo ya bụ g'unu egudekwanụ k'ukwe-iphemiphe ono gbakuta azụ l'emebyishi onwonye ono, ndu mgboko-a l'emebyishi onwophẹ; kẹle ẹphe eyedzujeru ọnu l'egu ẹjo-iphe anọduje agugbabe phẹ nụ; waa g'unu lẹ Chileke agbarụ mgba meje umere ọmaa ono, oome ono. ⁵ Ọo ya bụ g'unu kukebeje ẹhu se g'unu meje umere ọmaa yekwa l'ekweta unu. Iphe ọzo, unu e-yekwa l'umere ọmaa aburu anwuta.

⁶ Iphe ọzo, unu e-yekwafua l'anwuta iphe aburu esede onwonye. Iphe, unu e-yekwakwanu l'esedeje onwonye aburu ọta-nshi. Iphe, a-nọdukwa nu etso ọta-nshi aburu akwabẹ Chileke ùbvù. ⁷ Akwabẹ Chileke ùbvù aburu iphe, a-nọdu etso iya nu bu ehe onwunu. Iphe ọzo, unu e-yekọbefua l'ehe onwunu ono aburu n-yemobu. ⁸ Unu -nọdu emewaa egube umere ono eje l'iphe be unu taa bukwaru 'ogalemkpa; ọphu unu abueduru ndu ta amidu mebyi; l'amama unu maru Nnajiuphu anyi, bu Jizosu Kéreshi. ⁹ Ọle-a; onye iphemiphe ono teke erwubedu ẹka; atsukwa ishi; mbu l'onye ono ta ahumajedu iphe, nọ ẹnya. Teme onye ono zohawaa l'ọo Jizosu be sashikotaru iya iphe-ẹji, o shi mehawaa.

¹⁰ Ọo ya bu le-a; unwunna mu; ọ kwa unu bu ndu Chileke kuru hota unu mee unu buru unwu iya. Ọo iphe ono meru g'o gude unu jee ekukebeje ẹhu eme g'unu gude umere unu egoshi l'unu bupho unwu iya obu eviya; le teke unu emewaa iphemiphe ono be unu ta abyakpokwa eshiswe ọzo. ¹¹ Unu -nọdu emewaa nno ta adukpoekwa iphe, byakpo anọ-chi unu ọzo g'unu ta abahushi l'alize Jizosu Kéreshi, bu Nnajiuphu anyi, bya aburu Onye-Ndzota anyi.

¹² Noo g'o gude mu nọdu ari le mu a-nyatajekpoerupho unu iphemiphe ono. Mu makwaru-a l'unu machahawaru iya; teme l'unu pfushiwaru ike l'okpobe-opfu ono, e ziru unu ono. ¹³ Ọ buru iya meru mu nọdu ari l'ọ ka ree ge mu nyatakotaru unu iphemiphe ono nta-a, mu nokwadu ndu l'ulo-ekwa k'ogwehu-a gude yeru unu oku; ¹⁴ eshinu mu mawaru l'ọ to dudu g'ọo nọ-bekwaduru nta-a; mu alashia; noo kele Nnajiuphu, bu Jizosu Kéreshi be goshiwaru mu l'o rwuwaru mu l'alala. ¹⁵ Mu e-kukebekpopho ẹhu anyataru iya unu; k'ọphu bu mu -anọedu; unu ta

azỌhabeedu iya azỌha.

Ndu gudekpọo ẹnya phẹ hụma ùb̀v̀, Chileke kwabẹru Kéreshi

¹⁶ Lẹ teke anyi ziru unu k'ike Jizọsu Kéreshi ono, bụ Nnajiuphu anyi ono, bụ ike, oo-gude bya ọzo ono; bẹ ọ tọ bụkwa akọ-iphè, nemadzu ritaru l'ọriri iya bẹ anyi kọru unu. Anyịbedua bẹ gudekpọkwa ẹnya anyi hụma ọdu-biribiri iya. ¹⁷ Kẹle Chileke, bụ Nna kwabẹru iya ùb̀v̀ bya emee ya o gbua nwịnwii teke ono, ẹguru olu-opfu ono shi l'akpabiri Ogbu-nwịnwii rwua ya nchị sụ: “Onye ọwa-a bụ Nwa mu nwoke, mu yeru obu; o jiru mu ẹpho.” ¹⁸ Anyịbedua l'onwanyi nụmakwaru olu-opfu ono, shi l'imigwe ono teke ono, anyi l'iya tukuru nọdu l'eli úb̀v̀, dụ nsọ ono.

¹⁹ Anyi kabaa ekweshi ike l'iphemiphe ono, ndu mpfuchiru Chileke pfuhawaru ono bẹ bụkota ọkpobe-opfu g'ọ ha. Ọo-buru unu eme ree mẹ unu -nọdu angabeje iya nchị; unu dụ g'iphóró, nọ l'ẹka ọchii agba jasụ nchi abọhu; gẹ kpokpode nchi-abọhu ono ekeahaa paapaapa l'obu unu. ²⁰ Ọle ọphu kachakponu, bụ ọphu unu e-vukpọadaru ụzo maru bụ lẹ-a; iphe, ndu mpfuchiru Chileke pfuru ta adụkwa ọphu ẹphe shi l'uche phẹ pfua g'ọ dụ phẹ. ²¹ Kẹle mpfuchiru te eshidu l'uche nemadzu. Obenu lẹ ndu mpfuchiru, dụ-nsọ pfuru opfu, shi Chileke l'ọnu gẹ Unme-dụ-nsọ meru g'ẹphe pfua ya.

2

Iphe, e-me ndu mpfuchiru, epfu iphe, Chileke epfuduru

¹ Lẹ teke ndiche bẹ o nwekwaru ndu mpfuchiru shi epfujẹ iphe, Chileke epfuduru. Nokwaphọ g'ọ duru ndu a-nọdu l'echilabọ unu ezi iphe, Chileke epfuduru. Ẹphe a-jikachakwa jịka Nnajiuphu anyi, bụ Jizọsu; mbụ onye

ono, bu iya gbaṣutaru phe l'eka iphe-ẹji ono, ẹphe shi eme ono. Oo iphe ono meru g'o gude iphe-ẹji, ẹphe meshiru tukoru phe l'ishi. O buru iya e-me ẹphe alaa l'iyi ẹgwegwa. ² Ikpoto nemadzu e-mechakwaa tsoahaa phe; meahaa ẹjo ememe. Oburu iphe, ẹphe a-nodu emegbabe be ndu ta abudu ndu ke Chileke ee-gude wata epfubyishi okpobe-opfu ono, bu iya bu uzo ke Chileke ono, anyi etso ono. ³ Ndu ono, anoduje ezi unu iphe, abudu okpobe-opfu ono bukwapho ẹkpiri okpoga be eshitaje phe iphu. Ẹphe -gbeshi; ẹphe atuko uka, no le mgboko dzushia wushiru unu. Ẹphe egude nno ghopyabe unu l'ugho; ria unu okpobe okpoga. O le o to dukwanu g'oo-no-beru nta-a; Chileke anmaa egube ndu ono ikpe. Noo kele Chileke pfuhawaru iya ro teke ndiche dobe edobe. Mbụ l'iphe ono, bu iya e-gbu ndzu phe ono te ekujekwa mgbenya.

⁴ Le-a; o -buru le Chileke ta ahaduru unwu-ojozi-imigwe, meru iphe-ẹji g'ẹphe ria ya ke mmanu; o tua phe mkporo chiru ye l'oku-alı-maa; le tsukiribaa eka agba ochii g'ẹphe nodu ngaberu mboku ikpe onoya; ⁵ o -buru le Chileke ta ahaduru ndiphe ono, meru iphe-ẹji teke ndiche ono ke mmanu; obenu l'o gude utso bya atuko unwu-eliphe ono rigbushia; ndu o dzotar buerupho Nuwa, bu onye ezi phe k'apfubekoto waa umadzu esaa ozo kpoloko; ⁶ o -buru l'o nmaru Sodomu yee Gomora ikpe gude oku tsufukota phe ẹphe buru ntu; ẹphe chihu le mgboko l'ophu; shi nno mee ge ndu ta akwabedu Chileke ubvu maru egube iphe, ya e-me phe; ⁷ teme o buerupho Lotu, bu onye pfuberekoto be o dzoru l'eka ono, ndu eme ẹjo-ememe bu ono. Nno l'o shi abujeru; ndu alı ono -nodu eme ẹjo umere, rehuru erehu ono; l'odu Lotu ẹji shii; bya atsukwa iya pho l'ehu atsushi iya ya ike. ⁸ Mbụ-a; o to dudu

mbọku-mbọku, nwoke ono pfuberekoto ono te eshidu aphurwushije ɛnya; anurwushi nchi l'ejọ-ememe, ndu iphe-ẹji ono shi anọduje eme; k'ophu bu l'ejọ-ememe, oogudeje ɛnya huma me ophu onu le nchi shi anọduje agbawashi iya obu.

⁹ Oniya bu l'o -buru l'o noo g'o du bu ono; oo ya bu le Nnajiuphu maru-a g'oo-me dzoo ndu kweru nkiya; maru g'oo-me yeru phe aka g'ephe nahu iphe-ehuka, byapfutaru phe nu; bya amakwarupho g'oo-shi tuchia ndu iphe-ẹji l'eka ephe a-nodu; l'o nua phe aphu k'iphe-ẹji, ephe meru; o buru aka ono be ephe a-nodu jeye mbọku ikpe. ¹⁰ Mbu-a; ndu oo-kachakpo njo bu ndu ejọ-iphe ono; mbu ndu ono, buepho iphe, ephe anodujeepho achọ bu g'ephe mee iphe, bukpo iphe, egu iya enwu phe phuruphuru l'ehu; mbu iphe, bu ephe -mee ya; ephe emerwushia onwophe; ndu adudu onye ephe anuru opfu; mbu ndu ono, ezi iphe, abudu okpobe-opfu ono; ndu bu 'anu-le-nchi; ndu anoduje eku onwophe ekuku; ndu ata atsujedu ebvu epfubyishi ndu ono, a ta ahumajedu l'ɛnya l'ogbu-nwinwii imigwe ono.

¹¹ L'unwu-ojozi-imigwe be kakwa ndu ono ike okpobe akaka bya akakwa phe pho enweru unme; ole ephe te ejejekwa anodu l'iphu Chileke epfurwushi phe su l'ephe meru ẹji. ¹² Obenu le ndu owa-a; bu iphe, edoduru phe ɛnya be ephe anoduje epfubyishi. Ephe du g'anu-egbudu, enwedu egomunggo, bu iphe, a nwudoru phe bu g'a nmataje phe l'onya gbua; o buru g'e meru anu-egbudu bu g'ee-me phe; ephe alaa l'iyi. ¹³ Oo iphe ono a-buru urwu, ephe e-rita l'ejọ-iphe ono, ephe yeru aka ememe ono. Je akpachakpo l'echilabo eswe be ephe anodujeela-a eme g'ephe ria iphe ono, egu iya enwu phe phuruphuru l'ehu ono; ephe -nodu eme iya eh u atsole phe-a utso. Ono bu iphe, iphere bya aburu iphe, uta me

unu -nɔdu ahaję phę g'unu l'ęphe tũko eri nri; mę unu dɔkobe eri nri.

¹⁴ Lenaa l'ɔobujeru; ęnya phę -hũmawaa nwanyĩ; l'ɔogue phę phɔ g'a sũ l'ęphe lę nwanyĩ ono kwarũ. Ọphu ọ dũdu teke ęgu eme ęjo-iphe agũ-buhuje phę agũ-buhu. Ntanta-a ęphe edetawa ndu ọphu anɔshiduru ike l'iphe, ęphe kwetarũ; ęphe anma l'ɔnyà phę. Iphe, doru phę ęnya buępho g'ęphe e-shi kpaa okpoga. Ono bę ęphe metawaru jeye o ria phę ishi; ęphe buru ndu a tũwaru ɔnu! ¹⁵ Ęphe parũ ɔkpobe ọzo ono, pfũru nhamũnha ono haa eje phururugbadaa; bya eetsowaa ęka Belamu, bũ nwa Bosoru; mbũ onye ono bũ iphe, o yeru ęnya bũ okpoga, ɔokpa l'uzo apfũduru ɔto ono. ¹⁶ A baarũ iya mba ęjo-ememe ono; k'ọphu bũ lę nkapfũ-igara, ete pfujedu opfu sarũ ɔnu pfua opfu gę nemadzũ gude kpɔshia onye mpfuchiru ono eme umere onye ɔbvũ.

¹⁷ Ndu ono, ezi iphe, abũdu eviya ono bũ 'ɔgalemkpa. Ęphe dũ g'obvũ, mini tahũru. Ęphe dũ g'igwe -rwuchaarũ erwurwu k'edze mini; phęrephere zikaa ya. Chileke nmawaru phę ikpe. Ęka akwakɔberu phę bę gbahũru tsũkiribaa. ¹⁸ Ęphe anɔdujeepho epfu g'ɔ bũ phę kachaa amama; tęmanu opfu ɔbu abũkwarupho mkpɔkoro opfu. Ęphe nɔdu egudeje iphe ono, ęgu iya enwu phę phuruphuru l'ęhu ono gbabę ɔnyà nmata ndu buwokwadũ-a bę ęphe nahũru ndu eshiswe ọzo. ¹⁹ Ęphe ekweje phę ukwe enweru onwonye; ɔle ęphebedua l'onwophę te enwekwanũ onwophę. Ęphebedua bũ ohu umere, rehuru erehu ono, ęphe anɔduje eme ono. Noo kęle ɔo iphe, ka amadzũ ike; lwũ-kpee ya bę amadzũ bũ ohu iya.

²⁰ Mbũ lę ndu ono nwekwarũ-a teke ęphe shi maru Nnajĩuphu anyi, bũ Jizɔsu Kéreshi ɔkpobe amaru; mbũ Onye-Ndzɔta anyi ono. Sũ ọphu ęphe eshiędu eshi ęjo

uzo ono, emerwuje unwu-eliphe ono. A nonyaepho; ejo umere ono, ephe shi hawaa ememe ono lwa azu bya eria phe ishi ozo; ka phe ike lwu-kpee phe. O kwa iya bu l'onodu ehu onye ono abya aka njo; eme le g'o duhawaa le mbu. ²¹ Mbu-a; o gogo kakwaru egube onye ono ree; ome o to dukpodaa teke o majeru uzo bu o -shia ya; Chileke agua ya l'onye pfuberekoto; eme l'onye ono machaarū uzo ke Chileke bya atsu-phu azu haa emeje ekemu ono, Chileke turu iya ono. ²² O kwa iya bu l'iphe ono, aanmaje l'etu ono a-vua l'ehu onye ono, bu iya bu etu, a nmaru, suru le "Nkuta nwachaarū enwa laphu azu je erichaa ya." Etu ozo buru le "Ezi be a wuchaarū ehu; o laphu azu je ebvua epuchi." Noo ge ndu ono du bu onoya.

3

Nnajiuphu a-bya ozo

¹ Ndu mu yeru obu; owa kweakwa akpo ekwo-ozu ebolechiko, mu dewaru unu. L'ime ekwo-ozu labo ono be mu dewaru gude yeru unu oku; nyataru unu g'unu riye oriri iphemiphe ono, e ziru unu ono. ² Oo ya bu; unu nyatajekwa opfu, ndu mpfuchiru Chileke ono pfuru teke ndiche. Ndu ono bu ndu eeyeru ubvu. Unu anyatajekwapho iphe ono, Nnajiuphu, bu Onye-Ndzota ono shi l'eka ndu-ishi-ozu iya zia unu. ³ Iphe, e-vukpodaru uzo doo unu enya bu owa kpoda; mgboko-a bya l'abvu be o nwekwaru ndu e-mechaa buru ndu taa dujedu ike sede onwophe l'egu ejo-iphe, enwu phe phuruphuru l'ehu; bukwarupho ndu a-noduje aja unu ewenu. ⁴ Iphe, ephe e-pfuje bu; "?Denuhunu Jizosu obu, kweru unu ukwe le ya a-bya ozo obu? Kele e -shi teke nna anyi oche phe noru laa be iphemiphe dukwapho g'o du; e -shi teke e meru mgboko." ⁵ Ephe elekebekpopho enya; jika

jĩnyia ɛnya l'ɛphe taa rĩdu ɔriri iphe ono, Chileke meru teke ndiche ono. L'Ōo opfu, Chileke pfuru l'Ōnu kpoloko bɛ o gude mee igwe mee alĩ. Alĩ shi lɛ mini dũ; ɔ bũru mini ono meru iphe ndzũ dũ lɛ mgboko. ⁶ Tɛme lɛ Chileke meru igwe dzee mini; rigbukɔta iphe, shi dũ lɛ mgboko ɔphu shi dũ teke ono l'ophu; ɔ bũru ɔla-l'iswi. ⁷ Igwe yɛle ali, bũ ɔphu dũ nta-a bũkwa opfu ɔnu bɛ e gude sede iya g'Ō nɔdu jeye mbɔku, ɔku e-kepyashĩ iya, bũ iya bũ mbɔku oke ikpe ono. Noo mbɔku, Chileke a-nma ndu ta anũduru iya opfu ikpe; mee phɛ ɛphe abũru ɔla-l'iswi.

⁸ Ōle-a; ndu mu yeru obu; iphe lanũ unu ata zɔhajedu bũ l'ɛnya nnajĩuphu bɛ ujiku lanũ dũkwa iya-a g'ũnu-kũru-ũnu apha; ũnu-kũru-ũnu apha dũkwa iya phɔ g'ujiku lanũ. ⁹ Nnajĩuphu ta akpũkwa ɛhu akpũkpu eme iphe, o kweru ukwe iya, bũ iya bũ iphe, ndiphe anɔduje arĩ. Ō kwa nshi bɛ ɔotarũ anyi kele ɔ tɔ dũdu onye ɔ dũ iya g'a sũ l'Ō larũ l'iswi; ɔ chĩa g'izimanũ lwa onyemonye azũ.

¹⁰ Mbũ lɛ mbɔku, Nnajĩuphu a-bya bɛ ɔo-byakwa g'onye-oshi byaru oshi l'ɛnyashi. Mbɔku ono bɛ igwe ɛderu riiriirĩ mihu. Iphemiphe, dũ l'igwe; kpokpode mɛ ɔnwa mɛ ɛnyanwu bɛ ɔku e-kekɔta. Mgboko l'ophu mɛkpoo akanya, ndiphe seru dobe l'ime iya bɛ ɔku e-kepyashĩkotakwa. ¹¹ Eshinu unu mawaru l'iphemiphe-a, dũ lɛ mgboko-a bũkota iphe, e-kepyashĩhu l'ɔku; unu kwabɛkwarupho onwunu ɛnya meje umere, gbaru unu l'ememe. Unu nũjeru Chileke opfu; unu eworu ndzũ unu g'Ō ha ye iya l'ɛka g'Ō bũkotaru nkiya. ¹² Unu chĩerupho ɛnya yee l'ũzo; ngabɛru mbɔku, Chileke a-bya emebyia mgboko-a. Ōo mbɔku ono bɛ Chileke a-tũ ɔku l'igwe; oke okpomɔku apaa ɛka; k'ɔphu iphe, nɔkota iya nũ a-dazehũkota. ¹³ Ōle-a; Chileke bɛ kwekwaru anyi ukwe

emefũta igwe òphúú yẹe mgboko òphúú. Ono búwaa ndu p̄f̄uberekoto l'ɛnya Chileke bú ndu e-buru iya n̄u kpoloko. Ọ búru mgboko òphúú ono bẹ anyi ele ɛnya iya.

¹⁴ Ọo ya bú; ndu mu yeru obu; eshinu unu ele ɛnya iphemiphe-a; unu kukebeɛpho ɛhu dobe onwunu òrù g'ò t̄o d̄u iphe, aa-ta unu ỳta iya l'ip̄hu Chileke. G'unu lẹ Chileke d̄u lẹ ree. ¹⁵ Unu anyatajɛkwa l'iphe, meru g'ò gude Nnajiuphu n̄odu ata nshi ono bú g'unu bya gẹ ya dz̄o unu. Ọ kwaph̄o iphe ono bẹ nwanna anyi P̄olu, anyi yeru obu dehaakwaruph̄o unu l'ɛkwo-ozì, o detaru unu. Ọ kwa Chileke bẹ n̄uru iya mmamiphe, o gude dee ya. ¹⁶ Lẹ-a; iphe, búkotakpoo ɛkwo-ozì, o deru g'ò ha bẹ o p̄fuk̄otakwaru op̄fu iphe-a, e-mechaa mee n̄u-a l'iphe, búkpoo ɛkameka, o p̄furu op̄fu gbaa ya Ọkpa. Iphemiphe ono, P̄olu deshik̄otaru ono nwekwaru ndu ọphu oopfufe, te ekwejedu edo ɛnya. Ọ búru iphe ono meru g'ò gude ndu amadu iphe; mbu ndu ap̄fushiduru ike l'ekwekwe, ɛphe kweru kẹ Chileke; n̄odu ewojeru iya gha igharaphu, búhukwaa g'ɛphe aghajẹ ikpoto iphe ọzo, e deru l'ɛkwo-op̄fu Chileke. Ọ búru ɛgube ono bẹ ɛphe emeje gude ɛka phẹ meta ọla-l'iswi tukobe onwophẹ l'ishi.

¹⁷ Ọo ya bú; ndu mu yeru obu; eshinu unu vuwaa ỳzo mak̄otaru iphemiphe-a; unu kwabɛkwaru onwunu ɛnya gẹ ndu ẹjo-mb̄oku ono te eduphu unu; g'ɛphe te eme unu g'unu kweta l'ũka ono, ɛphe an̄oduje adz̄ushi ono bẹ bú ọkpobe-op̄fu; shi nno mee g'ọkpa chiswafu unu g'unu lufu l'ọkpobe ỳzo ono, unu p̄furu p̄fushia ike ono.

¹⁸ Ọo ya bú lẹ-a; g'eze-iphe-oma kẹ Chileke n̄odu aka shii l'ɛhu unu; unu akakwaph̄o amaru Nnajiuphu anyi bya aburu Onye-Ndz̄ota anyi, bú Jiz̄osu Kéreshi ọkpobe amaru. Ọo ya kpoloko kp̄ekpu bú onye aa-n̄odu akwabẹ ùbvù mb̄oku-mb̄oku jas̄u lẹ tuutuutuu lẹ m̄imiimii.

2 Pyıta 3:18

10

2 Pyıta 3:18

Nokwa g'ö dü.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d